



Act. 3. in qua Patriarcha Tarasius in confessione fidei, quam ibidem profert, vocat pariter Beatam Mariam semper Virginem. Concilium Ephesinum in Epist. Cyrilli ad Joannem Antiochenum, & refertur cap. cum præcella, extra de reliquiis, & venerat. Sanctorum. Concilium Lateranense V. sub Martino V. Consult. 5. Can. 3. Si quis secundum Sanctos Patres non confiteatur propria, & secundum veritatem, Dei genitricem Sanctam, semperque Virginem, & immaculatam Mariam, utpote ipsum Deum Verbum specialiter, & veraciter, qui a Deo Patre ante omnia secula natus est, in ultimis seculorum absque semine concepisse, ex Spiritu Sancto, & incorruptibiliter eam genuisse, indissolubili permanente, & post partum ejusdem virginitate, condemnatus sit. Denique in Symbolo Apostolorum, in Symbolo Nicæno, & in Symbolo Constantinopolitano legitur: Natus ex Maria semper Virgine.

IV. Probatur ex Patribus Græcis. Justinus Dialogo cum Tryphone Judæo Ephesi habitus, de cujus genuinitate Bellarminus non dubitat: Quod quidem certe in genere juxta carnem ipsius Abræhe nemo unquam e Virgine natus sit, neque natus esse dictus sit, præterquam ipse noster Christus, omnibus est manifestum &c. Filium hominis se ipsum Christus vocavit a nativitate sua e Virgine, quæ, sicut dixi, Davidis, & Jacob, & Isaac, Abrahamique genere fuit &c. Christus ex Virgine homo genitus, ut qua via a serpente inobedientia initium sumpsit, eadem via etiam exitum caperet. Eva enim cum Virgo esset, & incorrupta, serpentis verbo concepto, inobedientiam, & mortem peperit: fide autem & lætitia concepta Maria Virgo, cum nuntium ei lætum Gabriel Angelus attulisset: Fiat mihi secundum verbum tuum. Et orat. ad Antoninum Plum: Atque hic Spiritus, cum in Virginem illapsus esset, & illi obumbrasset, non per concubium, sed per virtutem, pregnantem eam reddidit. Irenæus lib. 3. cap. 27. Et in eo, quod dicit: Audite Domus David significantis erat: quoniam quem promissit Deus David de fructu ventris ejus æternum suscitaturum se Regem, hic est, qui ex Virgine, qua fuit ex genere David, generatus est. Propter hoc enim & de fructu ventris ejus Regem promissit, quod erat proprium Virginis pregnantis, & non de fructu lumborum ejus, nec de fructu renum ejus, quod est proprium viri generantis, & mulieris ex viro conceptionem facientis. Eusebius Cæsareensis de demonstrat. Evangelica lib. 4. cap. 10.

Christus more nostro est editus, & mortalis instar hominem indutus; sed non tanquam homo, verum ut Deus de purissima, nullaque experta Virgine nuptias. Cyrillus Hierosolymitanus Catechesi 12. Sed convincere nos student, tam Græci, quam Judæi, & dicunt, quod erat impossibile, Christum de Virgine nasci. Græcis igitur primum ex ipsorum fabulis os obstruamus. Qui enim dicitis projectos lapides in homines mutari, quomodo Virginem parere posse, negatis? Qui ex Jovis cerebro natam filiam fabulamini, quomodo ex utero virginali nasci aliquem impossibile esse, dicitis? Qui de femore veltri Jovis prognatum falso dicitis esse Bacchum, cur nostram veritatem rejicitis? Scio me indigna præsentis auscultatione dicere: sed ut opportune tu Græcos redarguas, hæc attulimus ex ipsorum fabulis, ad eos dicentes. Illis vero qui sunt de Circumcisione, sic occurrens, perquire: utrum est difficile senem & sterilem (mulieribus jam deficientibus) parere: aut virginem juvenem generare? Sterilis erat Sara, & deficientibus jam mulieribus, præter naturam peperit. Igitur cum & sterilem, & virginem parere sic præter naturam: aut utrumque nega, aut utrumque concede: Idem enim Deus utrumque operatus est: Neque enim audebis dicere, quod illic quidem possibile, hic autem impossibile est Deo. Et rursus, quæ natura manum hominis una hora in diversas species mutare potest, & rursus restituere? Quomodo igitur Moïsi manus, sicut nix alba apparuit, & rursus statim illa albedine illa destituta est? Sed dices, quia Deus voluit mutata est. Illic Deus volens potest: hic autem nunquid non potest, &c. O Judæi! Utrum autem difficilius est Virginem parere, aut virgam in animal mutari &c. Tacito hic quod Virga Aaron, quod reliquæ arbores per annos plures faciunt, hoc per unam noctem fecit. Quis enim nescit, quod virga cortice destituta, etiam si in mediis fluminibus planteretur, nunquam floreat? Quæro igitur sic ab illis: Eva ab initio de quo nata est? Quæ mater conceperat illam, quæ matrem non habuit? Accipiamus porro aliud longe majus. Ex corporibus enim corpora gigni, quanvis sit aliud quando paradoxon, sed possibile tamen: sed pulverem terræ hominem fieri, hoc multo mirabilius. Ex unius formæ pulvere & ossium robur, & pulmonis lenitatem, & reliquorum diversitatem membrorum